

Նրանք կանգնեցին մի բաւական կոկիկ տան հանդէպ: Դռները բացուեցան, մտան մի հովասուն, ծառագարդ բակ: Ծառերի ներքոյ նստած էր մի հասակաւոր բարեշուք կին եւ ինչ-որ հիւսում էր ձեռքում: Տեսնելով եկողորներին, դրեց իր ձեռագործը փոքրիկ, բոլորակ սեղանի վրայ, վերկացաւ եւ դիմաւորեց նրանց:

– Ա՛խ, պարոն Միսաբեան, – բացականչեց կինը, առաջ վազելով, – ես ամենեւին չէի սպասում... Ինչպե՞ս եք... այդ ի՞նչ բախտով... այդ ո՞ր քամին բերեց ձեզ... – եւ շփոթեցրեց հիւրին բազմաթիւ հարցերով:

Պարոն Միսաբեանը երկու ձեռքով բռնեց տիկնոջ աջը եւ բարեկամաբար սեղմեց:

Այդ ոտքից գլուխ, սեւ հագուստով պատած պատռելի անձը Բաղէշի հայ-բողոքականների երեց Ջալլաղն էր, որին այժմ իր տոհմանունով պարոն Միսաբեան էին կոչում: Իսկ նրա հիւրընկալը մեր վաղեմի ծանօթ Սազօն էր, որին այժմ կոչում էին Սարգիս Սեպուհեան: Փոխած դրութեան հետ, փոխուել էին նրա առաջոյ թե՛ կեղծ եւ թե՛ կրճատած անունները: Իսկ նրա տիկինը տէր Թողիկի դուստր Սօնան էր: Նա ամուսնացաւ իր հին վարժապետի աղջկայ հետ: Երկու բախտաւոր ամուսինները ունէին մի քանի զաւակներ, որոնց մեծը սովորում էր Գերմանիայում:

Տէր Թողիկը վաղուց չկար այդ աշխարհում. նա մեռաւ «ախտարքը» ծոցում...

Դ

Սալմաստ գաւառի Սաւրայ գիւղի հայոց թաղում խիստ աչքի էր զարկում մի մաշոած տուն, որը ոչ այնքան հնութիւնից, որքան անխնամութիւնից կորցրել էր իր վաղեմի շքեղութիւնը: Գիշեր եւ ցերեկ այդ խուլ, գերեզմանի պէս անմռունչ տան դռները փակ էին: Այնպէս էր թւում, որ ոչ ոք այնտեղ չէր բնակւում: Միայն երբեմն ճնշալով շարժւում էին ժանգոտած ծխնիները, դռները բացւում էին, դուրս էր գալիս մի թախծալի դէմքով կին, նստում էր դռան մօտի թումբի վրայ եւ ամբողջ ժամերով լուռ նայում էր փողոցի միջով անցնող գետակին, կարծես նրա տխուր մրմունջների մէջ կամենում էր թաղել իր սրտի դառն կակիծները: Նա իր հասակից անելի վաղ էր ծերացել, որպէս այն մաշոած տունը, որտեղից դուրս էր գալիս նա: Նրա տխրամած դէմքի թուխ գծերի մէջ, նրա սեւ աչքերի մթութեան մէջ նշմարւում էին անմխիթար հոգու խորին վշտերը, որ թաթուցած էին նրա խորտակոած, վիրաւորոած կուրծքի մէջ: Նրա սգաւոր հայեացքը այնպիսի տպաւորութիւն էր գոր-